

কবিদ্যাপুর

১৮ আঘস্টত আমি হি পেলহুঙ?

১৮ আঘস্ট ২০১১। আগরতলা রাচপথত ৪০০-র উগুরে চাঙমার ৭ জানুয়ারি ২০১১-ত লোয়ে চাঙমা ভাচ ভালেদি শল্লাদারি জধার চাঙমা লেঘা চালু গোরিভার সিদ্ধান্তগান বলাবত গোরিভার দাবি গোরিনেই মিছিল। এ মিছিলানে আমারে হি দিলো ? ২৯ আঘস্ট ফদাঙতাঙ ওয়ে ইয়েনে আমারে চাঙমা লেঘা দি ন পারিলো। সালে আমার হি গাত পরিলো ?

গমে তলবিচ গরিলে ১৮ আঘস্টর আরকানিগানে আমারে চাঙমা লেঘা আনি দি ন পারিলেয়ো সবায় গাত ন পরে। ভালক্কানি হারনে সেদিনে তিবুরার চাঙমা বিজগত ইক্কো নুও খেলা হোর উত্তে ভিলিই আমি ধরি নেজেই পারিই। - ১) হম হম গরি অহলেয়ো এবারদই পলিম তিবুরার বে'ক বামতুন মানুচ এনেই হনক্কান হামত জুক দুওন্নি, ফেনি, গুমেত, মনুগাঙ, দেবগাঙ এক জাগাত মিল্লোন - ইয়েন চিগোন হধা নয়। ইয়েন হিবু ইরুক জুগোর উদো লো-লি গোরিভার পথানি দবদবা ওহবার হারনেয়ো ধুরি পারা জায়। ২) তিবুরার চাঙমা জাত ভালেদি হামত গঙ ন থেবার এক্কান মুলুক হারন আমা বুরো আ গাবুচ্যেগুনো ভিদিরে গম তালমিল ন থানা। বুরো, গাবুচ্যে আ ছাত্রগুনোরে এক জাগাত মিলেবাত্যেই এবারদই পলিম এক্কান ভেইল ধরি চেরেসথা গরা ওয়ে। অল ইন্ডিয়া চাকমা কালচারেল কনফারেন্স, ইয়ং চাকমা এনোসিয়েশন আ ত্রিপুরা চাকমা স্টুডেন্টস এসোসিয়েশন - এবারর সান জুদি মুজুঙোর দিনুনোদ' ঘেছেকগোরি এক ঘজায় হাম গরি পারন সালে তিবুরার চাঙমাগুনোর মুজুঙোর দিনুনোর বিজক জুদোবাবদর অহুদে বাধ্য। আ ৩) এ আরকানিগানত আমার জিয়েন বেগ' দাঙর উঝোল হোই পারিই সিয়েন অহলদে - এ আরহানিগানে হামাক্কায় গোরি চাঙমাগুনোর রুমে রুমে ভিদি থেয়ে ঔপনিবেশিক মানসিকতার পাগোচ্যে গাছেহাত দরমর' হুপ বোবোই পাছে। আগেধি মনে গরা অহুদ' আমি ব্যানারানিত হি লেগিলোঙ তারা ন বুঝিলে আমার হন' লাপ নেই, আমি শ্লোগানেদি হি মাঘির সিয়েনি তারা ন বুঝিলে হনা ন হনা সঙ - এই জে চাঙমাগুনোর 'তারা' কেন্দ্রিক মানসিকতা - ইয়েন চাঙমাগুনোর জুক জুক ধুরি পরর অধীনতল থেবার ফল, জিয়েনরে হুও অহুয় ঔপনিবেশিক মানসিকতা। আগরতলা টাউনর শন শত বেজাদির সেরেদি চাঙমা লেঘাদি বর বর গোরি লেখে ব্যানার ধুরিনেই বুক ফুলেই উজেই জানা, হাজা চাঙমা হধাদি জোগার পারি পারি শ্লোগান দেনা - ইয়েনিয়ে তিবুরার চাঙমা বিজগর তেক ঘুরেই দিবো সিয়েন দায়হাম মারি হুও জায়।



৩য় ঞ্চু ঞ্চক ঞ্চক

AICCC YCA TCSA

- তিবুরাত বাদিমাদি চাঙমা বামর পলিম থরর স্কুলানিত চাঙমা লেঘা চালু গরা পরিবো।
- মিজোরামর বে'ক চাঙমা বামানি এগত্তর গরিনেই বাদিমাদি চাঙমা অটোনমাস ডিস্ট্রিক্ট কাউন্সিলো দাঙর গরা পরিবো।
- অরুনাচলর বে'ক চাঙমাগুনোরে বাদিমাদি চাঙরি সুমুত্তো বে'ক বাবদর জু দ্যে পরিবো।
- বাংলাদেবর জুগোলিবিধেনত আদিবাসীগুনোর তুলোপারা গরিনেই হিল চাদিগাঙ শান্তি চুক্তি বামামাদি বলাবদ গরা ওহুক।

চাঙমা লেঘা দাবি গোরিনেই ডেপুটেশন

(পলিম পাদার জেরে) ডেপুটেশনর ফলাফলর পইদ্যেনে জানান দ্যে। তে জানেয়ে, শিক্ষে মন্ত্রী তপন চক্রবর্তী চাঙমাগুনোর দাবীগানর লগে পুরোপুরি একমত ওয়ে আ বাদি মাদি সরকারর তপ্পেত্তুন আরকানি নেজেবার হধা দ্যে। সে মোতাবেক ২৯ জুলাই তা চেম্বারত চাঙমা ভাচ ভালেদি শল্লাদারি জধার বে'ক চাবাঙিঘুন আ চাঙমা লেঘা দাবি গোরিয়ে জধাগুনোর তপ্পেত্তুন চাঙমা অসীম রায় আ অনিরুদ্ধ চাঙমা সুমুত্তো তেমাঙ দাক্যে।

ডেপুটেশনত ৪০০-র উগুরে চাঙমা গদা তিবুরাতুন সমার বোত্তোলোই। গুধেত্তোর এক্কোবারে মুজুঙে থেনেই আকসোই নেজেয়ে শ্রোত রঞ্জন খীসা। জে জে হাম্মোঙন নানান বামতুন মুকপাতি ইজেবে মিছিলোত এলাক সিঙন ওহ্লাক্কে, কাঞ্চনপুর - চন্দন কুসুম চাঙমা (চাঙমা গাবুচ্যে জধার তিবুরা রেজ্য কনভেনিঙ কমিটির কনভেনর), পেজাতুল - সুজয় চাঙমা (চাঙমা গাবুচ্যে জধার পেজাতুল বাম কমিটির কনভেনর) আ ধনক্কর চাঙমা (চাঙমা ভাচ ভালেদি জধার কবিদ্যেঙ), নবীনসরা - সুপাছ চাঙমা, কুমারঘাত - শুক বিলাস চাঙমা, ধর্মনগর - শুবম চাঙমা আ কুসুম কান্তি চাঙমা(চি) (তিবুরা চাঙমা ছাত্র জধার ধর্মনগর খেলার সভানানু আ রিবেঙ কবিদ্যেঙ), কৈলাশহর - শুভক্কর চাঙমা আ সদক চাঙমা (চাঙমা ছাত্র জধার কৈলাশহর খেলার সভানানু আ রিবেঙ কবিদ্যেঙ), ছৈলেংতা - তপন চাঙমা (চাঙমা গাবুচ্যে জধার ছৈলেংতা বাম কমিটির কনভেনর), অজিত কান্তি চাঙমা (এজাল কনভেনর) আ মহাদেব চাঙমা (এজাল কনভেনর), হমনু - দেবল চাঙমা ('মাদি'-র জুর কবিদ্যেঙ), মতিলাল চাঙমা (জুর কবিদ্যেঙ) আ পদ্ম রঞ্জন চাঙমা, গভাসরা - সুমন্ত সেন চাঙমা আ সুধন্য চাঙমা, বরবারি - ললিলাক্স চাঙমা আ কবুলেশ্বর চাঙমা, আগরতলা - দীপল চাঙমা (তিবুরা চাঙমা ছাত্র জধার সভানানু), শঙ্কলাল চাঙমা (রিবেঙ কবিদ্যেঙ), নেত্রন চাঙমা (হাহরা কবিদ্যেঙ), যতন চাঙমা (ভাঙালি), বকুল বিকাশ চাঙমা (কালচারেল কবিদ্যেঙ), রিবেঙ জধার চাবাঙি বিপ্লব জ্যোতি চাঙমা, জয়েশ্বর চাঙমা আ অনেগে।

চাঙমা লেঘাদি ব্যানার, ফেস্টুন, প্ল্যাকার্ড লিখিনেই চাঙমা হধাদি শ্লোগান জোগার পারি পারি আগরতলার এ মিছিল আ ডেপুটেশনান তিবুরা সরকাররে হোত্তোমান মেহুজেই পাছে সিয়েন এভ' আন্দাচ পা' ন গেলেয়ো তিবুরার চাঙমাগুনোরে বিশেচ গরি গাবুচ্যেগুনোরে)জে নুও গঙ আনিদ্যে সিয়েন গমে মেহুত পা' জেয়ে।

বিজিদি গেল' চাঙমা লেঘা

(থুম পাদার পরে) আগলে মাস্টরনোরে ট্রেনিঙ দিনেই বাদি মাদি চাঙমা লেঘা চালু গরিবেতেই চাপ দিদাক আ মন্ত্রীনানু সিঙিরি প্রস্তাপ্তান পাদেধ' সালে ক্যাবিনেদে মানিবের সম্ভাবনা বেচ এল' আ একবার চাঙমা লেঘা চালু অহলে বলে অহলে লারে লারে সরকারে চাঙমা মাস্টর নিয়োগ দি পেলুন। জানা জেয়ে চাঙমা গাবুচ্যে জধার রেজ্য কনভেনিঙ কমিটির চাবাঙি কুসুম কান্তি চাঙমা সুমুত্তো চাঙমা লেঘা পারিয়ে আ চাঙমা লেঘা লোনেই জিঙনে দুমুরো-দুমুরি গত্তন সে বাবদর হয়েকজনরে তেমাঙত নেজেবাত্যে যোগমায়া চাঙমা, নিরঞ্জন চাঙমা, বিমান দেবান আ প্রগতি চাঙমাে বার বার হোজোলি গরানা সত্তেয়ো শল্লাদারি জধার হন জনে সে পইদ্যেনে মনবুক ন গরন।

তেমাঙত আর' জে সিদ্ধান্তগানি লুও ওহুয়ে সিয়েনি অহলদে : ১) রেজ্য সরকারর সান এডিসি বামর স্কুলানিদো চাঙমা ভাচ চালু গরিবাত্যেই স্কুল এডুকেশনর প্রিন্সিপাল সেক্রেটারী এডিসি-র চীফ এক্সেকিউটিভ অফিসাররে হোজোলি গরিভো, ২) এডিসি-র শিক্ষে দপ্তরর প্রিন্সিপাল অফিসাররে চাঙমা ভাচ ভালেদি শল্লাদারি জধার চাবাঙি বানানি অহব', ৩) জে জে স্কুলানিত ইক্কনু চাঙমা ভাচ পরানিহু অহর সিয়েনির আহ্বাল দোলে বুঝিবেত্তেই শল্লাদারি জধার চাবাঙিগুনে সিত্তন হয়েক্কান রিনি চেভত্তেই জেবাক আ ৪) লেদেরেই দেবান হায়র সেকেক্ভারি স্কুল সুমুত্তো জে জে স্কুলানিত দরকার চাঙমা হধার বই পাথেবাত্যেই কাঞ্চনপুরোর স্কুল ইসপেক্টররে ওহুজানি অহব'।

চাকমা স্কুল টিসার্চ এসোসিয়েশন

(থুম পাদার পরে) বেঘ' দাঙর গরবা ইজেবে থুবো এল' মানবলা ধুমুলুক সামালানা মন্ত্রী নীহার কান্তি চাঙমা। সেবাদে থুবো এলাক লুঙসেনর সাব ডিভিশনাল এডুকেশন অফিসার লালখুমছিঙ আ লুঙলে জেলার সর্ব শিক্ষা অভিজানর ডিস্ট্রিক্ট প্রোজেট কোঅর্ডিনেটর আর. লালদাঙলিয়ানা। ইক্কনু জুদিয়ো বানা লুঙলে জেলা ভিদিরে তেমাঙ গোরিনেই এ জধাবো বানানি ওয়ে, মাত্তর জেরেদি গদা মিজোরামত খেলা বানেবার আরকানি নেজা অহব'। বেক চাঙমাগুনো সিধু শিক্ষের প'র ছিদি দেনা এ জধারুওর আবাল হাম অহব' ভিলি জানেয়ে সভানানু দাঙ্গু সুয়েন চাঙমা।

জাদ ভালেদির আহুওজ লোনেই ধর' বেঘে আহুদে-আহুদ, বানেবঙ বেঘে জধা ওহুনেই তজিমপুরো চাঙমা জাত।

বর্ষে লয় নল্ল প'ক'ত

বর্ষে লয় দীর্ঘত্ব। বর্ষে ত্ব'ত ত'ত্ব।

জ'দ	র'ঙ	ক'ম	ক'ল	ক'দ	ক'জ	প'ত	ব'ঙ
Jodha	Ranga	Ham	Hala	Hodha	Uju	Pot	Benga
প'ন	প'নিত	ন'বালঙ	ম'চ	জ'ক	ব'দি	চ'রদন	
Po'n	Panhit	Nabalang	Mach	Jhak	Bodi	Chorodon	
প'র	চ'গুরি	ব'র	চ'গুরি	ভ'ত	র'নেহ	ম'লা	ব'রিহ
Puor	Chaguri	Bo'r	Chaguri	Bhat	Ranhe	Mala	Burhi
আ'মাহ	দ'ধা	এ'গপরা	শ'ইদোল	গ'ভি	স'য়'ত	প'য়	
Amha	Dadha	Egopora	Shidol	Gabhi	Syot	Pa'i	

ন'য় প'ত

ক	ক	ক	ক	ক
চুচেঙে-কা	ঙজঙে-খা	চান্দ্যা-গা	তিনডাল্যে-ঘা	চিলেমুও-ঙা
দ	দ	দ	দ	দ
দিদাচে-চা	মজরা-ছা	দিপদলা-জা	উরোউরিহ-ঝা	চিলাছে-এগ
ড	ড	ড	ড	ড
দিআহাদা-টা	ফুদোদিআহাদা-ঠা	আধুভাঙা-ডা	লেজভরা-চা	পেত্তুও-পা
ত	ত	ত	ত	ত
ঘঙদাত-তা	জগদাৎ-থা	দোলনিৎ-দা	তলমুও-ধা	ফারবান্যা-না
প	প	প	প	প
পাল্যে-পা	উবোরফুদো-ফা	উবোরমুও-বা	চেরদাল্যা-ভা	বুগোতদলা-মা
ল	ল	ল	ল	ল
চিমজ্যে-য়া	দিদাচে-রা	তলমুও-লা	বাজনে-ওয়া	ভুদিবুক্যা-শা
	উবোরমুও-আহ	পেতফাদা-লাহ	পিচপোঝা-আ	

ক	- কা (Ha)	ক	- কাই (Hai)
ক	- কা' (Haa)	ক	- কুআ (Hua)
ক	- কাহ (Hha)	ক	- কুও (Huo)
ক	- ক (H)	ক	- কো (Ho)
ক	- ক' (Ho)	ক	- কই (Hoi)
ক	- কি (Hi)	ক	- কেই (Hei)
ক	- কু (Hu)	ক	- ক্যা (Hya)
ক	- কে (He)	ক	- ক্রা (Hra)
ক	- কে' (He')	ক	- কাং (Hang)
ক		ক	- কাঁ (Han)

চলন্দি
নাটক



সাজন্যে প'রর সমারী

বেদ্যে
অনিল কুমার চাঙমা

।। পইধ্যে-১৬ ।।

মঙ্গলে ঘরত লুঙিলগি ।

মঙ্গল : ভাত হেই জেয়ো পুতলক ।

আভু : আ হাক্কা নাক্ক হুধু জেয়ে ?

মঙ্গল : (চোষোপানি চেরাঙ চেরাঙগরি) আ হি হোম পুতলক । এচ্ছে তিন মাহ্চ অহল' ঝিবো আহ্জি জেয়েগোইধে । হুধু জেয়ে এভ' হিচ্ছু উদো ন পেলঙ । বে'ক হবাল' দুচ হি আর গরিভো ।

অনিল : আ এধে হিচ্ছু হহ্বর ন পায় । (ফ'দুবো দেঘেইনে) তা নাঙান হিদে ?

মঙ্গল : হন্বা ? ও মনি ? তা বাপ-মা দুওজন বিদি জানার পরে এচ্ছে চের-পাচ ববার অহল' তে তা মোল্লে ঘরত আগেগোইদে ।

আভু : তা মোল্যেভুও ঘরান হুধু ?

মঙ্গল : হুধু হোবারে । আমা নাক্কবোলোই একরে পরানে পরান এলাক্কে স্যে । মুয়ো ভারি তোগেয়োঙ তারে এক্কা আমা নাক্কভুও হহ্বর হন' পায়নি পুবোর গরিবাত্যেই । (আভু আ অনিলে দুওজন চা'-চি গরি হবালত আহ্চ দিলাক ।)

।। পইধ্যে-১৭ ।।

মনি, গঙ্গা, হলঘি আ হযেকজনে হিয়োঙতুন লামি হধা হোয় হোয় এজধন ।

গঙ্গা : হি বর মাগিলা ভোন লক ?

হলঘি : আ তঙে ইক্কো দোল নেক বর মাঘি দোঙ আয় ।

মনি : তোমার অহলে এ বানা সিয়নি । জেদঙভুও ঝাদি । এধক্কন এঞ্জেলর ইচকুল সুতি ওয়ে অহবল । মরে বাচ্ছেই খেবদে য়ে ।

আহ্চদে আহ্চদে তারা গারি পধত লুঙিলাক্কি । সুমলদাঘি গারিত গরি এত্তন । মনিদাঘিরে দেনেই থামেলাক ।

সুমল : (মনিদাঘিরে আহ্চি জাদে হানক্কন রিনি চে'ই খেই) ও দোলবিদাঘি হুধু জেবা ? এবানা গারিহ্চ উধোগি । বারেই দিয়োই । (মনিদাঘি মাধানিগুরি অলরগরি আহ্চন । সুমলে এবার মনির আহ্চতানত ধরিলগোই ।) আয়না ভোন গারিহ্চ উত্তি । (সুমল' সমার'ন হাক হাক গরি আহ্চি উধোন । মনি আহ্চতান সরেবার চা'য় । সে অক্তত এঞ্জলে লুঙিলগি ।)

এঞ্জেল : (ধাবা ধাবা এনেই) ইরিদে বেভেইরে ইরিদে । (এঞ্জলে সরেই দিবার চা'য়, সুমলে ইরি নদে । এবার এঞ্জলে জেবতুন ইক্কো হলম নিহ্গিলেই সুমল' আহ্চতান গুদেই দিলো । সুমল' আহ্চতানতুন লো পরেল্লি । সুমলে এবার এঞ্জলেরে এধ' চুয়োরত মাদিত ফেলেই দিলো । মনি হিজেহিচ্ছে গরি এঞ্জলেরে আজাগরি ধরিলগোই ।)

সুমল : (আহ্চতান পুচ্ছেই পুচ্ছেই) গম ন লাগিলো । দোলবি তরে চে'ম মুই । বাচ্ছেই থাক । (এবার তারা গারিহ্চ উধিলাক্কোই আ ঝিমিদোত মিলেই গেলাক্কোই । মনিদাঘিয়ো আহ্চা ধরিলাক ।)

মনি : (এঞ্জলেরে) ঘরত গেলে মামিদাঘিরে ন হোচ্ছেই বুঝো পরান । (এঞ্জলে তিঘুত তিঘুত গরে ।)

।। পইধ্যে-১৮ ।।

বাদালি ইচকুল সুতিদি ঘরত জার । এমন সময় আভু আ অনিলে এত্তন । তারে দেনেই আভুদাঘি লুগেলাক । বাদালি গেলগোই ।

আভু : ভালান দেঘে । দেধ' এক্কান নয় এক্কান হাম বাবেই দিলুন । তে অনিলভেই মুইদেয়ে মনিরে তোগা জেম্মে । জেই না এক্কা বল দেগোই ।

অনিল : হুধু তোগেবেগোই পারা পাচ । হুধু আঘে উধুচ নেই ।

আভু : চা' ভেই, তুই জুদি এক জনরে মনে-পরানে পোচপাচ্ছে অহয় সালেন তে মনেহলে পিত্তিম হাজাত থোক তুই সুক পেভেই পেভে ।

অনিল : আ জুদি তে এধক ভুলোন বোও জায়দে অহয় সালে ?

আভু : সালেদ' গরিভার হিচ্ছু নেই । মাত্তর সুক ন পায় সঙ দ' তে বোও জেয়ে না ন জায় হোই পারা ন জেব' ।

অনিল : ঠিক আঘে । এক্কা ঘরত জেই চা'ঙ, মুই তরে জানেম । চিগোনতুন ধুরি তুই মর হন' হধা ন ফেলাচ, মুয়োদ' পাত্তেভাগে ত' হধানি এক্কানো ফেলেই ন দ্যোঙ ।

আভু : সিগুনেরইদ' হন্বে সমাচ্যে । এক জন' হামত এক জন লাগানা ।

অনিল : ঠিক আঘে, জেবঙ আয় ।

।। পইধ্যে-১৯ ।।

বাদালি তেবিলোত লেঘা লেঘের । আভু ইক্কো বেক বাঙামোচ্যেগরি গুধিবোত্তন নিহ্গিলি তা বাব' মুজুঙে থিয়েলগি ।

আভু : বাধো মুই ম সমাচ্যেগুনো লঘে বেরা জাঙর । তিন-চের দিন লাগিবো ।

বাদালি : আ আবাদাচ্যে হন' হবর নেই, বাত্তা নেই, হহ্চা-উদুচ্যে হুধু বেরা জত্তে ? দিন-হাল ওয়ে গম নয় ।

আভু : ঘিলেতুলিত অনিলর মোজেঙা আগেধে এ সিধু জেবঙ্গে ।

বাদালি : চে'চ হবদার, জ্যেনপায় ন সুনোঙ পারা স্যে । তে' হন্বা হন্বা জেদা ?

আভু : অনিল্লোই জেবঙ্গে আয় । জাঙর ।

বাদালি : (আভু জাত্তে পত্তানধি রিনি চে'ই চে'ই) হমলে চিদে আবুজিবো হিজেনি ।

।। পইধ্যে-২০ ।।

আভু এক্কান দবধা পধত ঘুরি চে'ই চে'ই অনিলরে বাচ্ছেই আঘে ।

আভু : (অনিলরে ফুনগরি চা'য়, ফুন ন লাগে) মরার অনিলে । মিজে হধা হোয়েধে । হবালপরা এবধে ভিলে । এধক্কন সঙ মাগানা মাগানা বাচ্ছেই আগঙ্গে ।

(হাক্কন ভাবিনেই) গায়ো হুধু জেম ... (বচ্ছেত্তন থিয়েই উধিনেই) জেম্মে । লাম্মোঙ জগন, জিধু লুঙিদুগোই সাত । (ঘুরিবো চা'ধে চা'ধে লত দিলো) তে জানার সমারে সমারে অনিলে লুঙিলগি । তেয়ো সুয়োত বাচ্ছেই থায়ি ।

অনিল : মরালাক্যে ইয়োত ভিলে বাচ্যেই খেবগিদে । দি ঘনতা অহল' বাচ্ছেই আগঙ্গে এবা' পাত্তা নেই । জেম্মোইদে । জেবার অহলে তে আমেনে আমাইধু এভ' । (গেলঘোই)

(.....জেরর নাদাত)

দুরোত্তন সাহচ দেঘেই বেঘে পারন । - ঈশপ ।

আমা অহরক - আমার জনম অধিকার

পরিতোষ চাকমা

চাঙমা, বাংলা আ ইংরেজি প্ল্যাকার্ড আ ব্যানার ধরিনেই আগরতলার রাচপথত ১৮ আগস্টর চাঙমাগুনোর মিছিলান ইরুক চাঙমা বিজগর ইক্কো পতপতে তেক। গুরো-বুরো-মিল্যে-মরত মিলিনেই ৪০০ জনর উগুরে মানুঝোর মিছিলে বানা মিছিল একান নয় - ইয়েন চাঙমা জাদর জাগি উদিবের মাজার। তিবুরা সরকারে চাঙমাগুনোরে বলে বলে বাংলা অহরক বুগেই দ্যে। ইয়েন গদা চাঙমা জাত্তোরে অগমান গরে পারা আ ভারদর সংবিধেণত নাদা গুলেক (Minority) জাত্তনোর নাঙে তুলোপারা গোচে অধিকার হারি লয় পারা।

ভাচ-নাগাগুলেক (Linguistic minority) সুমুঙে জুদো জুদো নাদা গুলেক জাত্তনোত্তেই ভারদর সংবিধেণে অজন মজিম গা-রখে (Safe gourd) রাগেয়ে। সঙতলবিচর (Right to equality), সঙবিজেরর (Right to non-discrimination) অধিকার বাদেয়ো হয়েকান অধিকার বানা নাদা গুলেকনোত্তেই সংবিধেণে তুলি ধচে। আর্টিকেল ২৯(১)-ত সঙবিধেণে পতপতে গরি হয় জে, “নাগরিগোর জে হন” ভাগর নিজোর ভাচ, লেঘা আ সুখোম বাজেই রাঘেবার অধিকার আঘে।” সংবিধেণে ইয়েনো হয় জে, রেজ্য সরকারে জে’ন শিক্ষের পলিম হাবত মা-ভাচ্ছেই শিক্ষে দিবের অজন মজিম জু তুলি দে (আর্টিকেল ৩৫০ এ)। শিক্ষেত মা-ভাচ্ছেই তার নিজোর লেঘাগানরে হামাকায় ফারক গরি ন পারে।

তিবুরা সরকারে চাঙমা হধা চালু গঙে রাজি ওয়ে মান্তর চাঙমা লেঘা নয়। নিজো লেঘালোই চাঙমা নাদাগুলেকনোত্তেই পরিবেত্তেই ন দেনা আ বাংলা অহরক বুগেই দেনাঘান তিবুরা সরকারর অসাংবিধানিক আ অগণতান্ত্রিক হাম। আবল পুঝোরান ইয়েন জে, চাঙমাগুনোর শত শত ববরর পুরোনি আ তজিম অহরক থাগদে তারা হেত্তেই অন্য জাদর লেঘালোই নিজোর ভাচ লিখিবাক-মাদেবাক? তিবুরা সরকারর উচিত চাঙমা লেঘা চালুর জাননি দিনেই ভাচ-নাদাগুলেকনোর অধিকার রখে গরিভার তার সাংবিধানিক দায়িত্তো পালানা।

দুচ হার ?

তিবুরা সরকারে চাঙমা লেঘা চালু ন গরানা দুচ্ছান হার? তিবুরা সরকারে উজু গরি চাঙমাগুনোরেই, গমে হধ’ গেলে, চাঙমা ভাচ ভালেদি শল্লাদারি জধা (তেকহাবাগরি ‘শল্লাদারি জধা’)-রে দুচ দে, জে জধাবোর মাধা এক জন চাঙমা। SCERT-র ডিরেক্টরে উদকি সদক-র অজল কাবিদ্যেঙরে (General Secretary) লেখে তার ১৬ আগস্ট ২০১০-র চিধিত জানেয়ে - “Chakma Text-Books are being prepared in Bengali Scripts on the basis of the resolution adopted in a meeting of the Advisory Committee for Development of Chakma Language held on 10/08/1998, which was approved by the higher Authority vide DO.No. 256/Min/Edn/99 dated 1-4-99” (চাঙমা টেক্সট বই বাংলাধি বানানি অহর চাঙমা ভাচ ভালেদি শল্লাদারি জধার ১০-০৮-১৯৯৮ তারিগোর তেমাঙর সিদ্ধান্ত মজিম, জিয়েন উগুরোত্তুন DO.No. 256/Min/Edn/99 dated 1-4-99 মজিম মানি লো ওয়ে।) চিধিগানত ইয়েনো লেঘা এলদে জে, “স্কুল শিক্ষে দগুর চাঙমা ভাচ ভালেদি জধার শল্লা/হধা মজিম হাম গরে।” তা আগেই চাঙমা ছাত্র জধার কাবিদ্যেঙ অনিরক্ক চাঙমার RTI-র একান পুঝোরর জুওবত ২৫ ফেব্রুয়ারী ২০০৮ SCERT-র ডেপুটি ডিরেক্টর শ্যামলী দেববর্মা জানেয়ে, “বাংলা অহরক (চাঙমাগুনোত্তেই) গঝি লুও ওয়ে চাঙমা ভাচ ভালেদি জধার শল্লা মজিম।” ইয়েনো দুচ দ্যে অহয় জে, শল্লাদারি জধা ১০ আগস্ট ১৯৯৮ চাঙমাগুনোরে ঘুমত থোনেই বাংলা অহরক গঝি লোয়ে। আমল দিবের লাক জে, তারার উগুরে এ দুচেনি শল্লাদারি জধায় হন’ দিন পরাক পরাক গরি নাহান্দার গরি ন পারে।

মান্তর, তলবিচ গরিনে হধ’ গেলে, শল্লাদারি জধা ১৯৯৮ সনর আগে চাঙমা লেঘা চালু গরিবেত্তেই সবায় চেরেস্থা ন গরেধে নয় - গোছে। জে’ন ৮ অক্টোবর ১৯৯৩ সনর তেমাঙত চাঙমা লেঘা চালু গরিভের রেজিলিউশানর হধা ইয়েত আমি তুলি ধরি পারিই। মান্তর রেজ্য সরকারে সিয়েন ন মানে. উগুধো No. F.19(8-11)-DSE/88(2-3)/850-58, dated Agartala, the 05 September 1995 চিধিমুলে ফগদাঙ গরিলো জে চাঙমা হধাঘান স্কুলোত পরানি অহব’ বাংলা অহরগেধি। সালে ইয়েন ফদাঙতাঙ জে, শল্লাদারি জধার ১০ আগস্ট ১৯৯৮-ত লোয়ে রেজিলিউশানর আগেই আজলে সরকারে বাংলা অহরক বুগেই দিবের জুঙ্কোল গরি থোয়ে।

হাগোচ-পত্র মুলে ইয়েনো প্রমান পা’ জেয়ে জে, শল্লাদারি জধায় হামাকায়গরি চাঙমা লেঘা চালুত্তেই আরকানি নেজেয়ে। ২ নভেম্বর ১৯৯৫ Officer-in-Charge, Tribal Language Cell, Directorate of

School Education, Agartala শল্লাদারি জধার চাবাঙিগুনোরে চিধি দিনেই জানেয়ে, “The Hon’ble Education Minister has kindly agreed to introduce only Chakma Language subject in Chakma Scripts from Class III onwards at the Primary level as per report submitted to this office by the Chairman of Advisory Committee for Development of Chakma Language.” (চাঙমা ভাচ ভালেদি জধার সভানানুর এ অফিসত গবেয়ে রিপোর্টমজিম পলিম খরত ক্লাস থ্রি-তুন ধুরি চাঙমা লেঘাদি চাঙমা হধা শিগেবাত্তেই মানবলা শিক্ষে মন্ত্রীনানু রাজি ওয়ে)।

মান্তর তিবুরা সরকারে হন’ দিন তার হধা ন রাঘায়। চাঙমা লেঘা চালু ন গরিবেত্তেই তার জে হন’ একান সুদো দরকার আ সিয়েনই পা’ জেয়ে শল্লাদারি জধার ১০ আগস্ট ১৯৯৮ সনর তেমাঙানত। মান্তর সিয়ে ভিলি শল্লাদারি জধারে মাপ দ্যে ন জায়। তারা নিজো জাত্তোরে ভালক্কানি পুঝোরর জুওপ দি পেভার বাগি আঘে।

২৯ আগস্ট ২০১১ শিক্ষে মন্ত্রী তপন চাক্রবর্তী শল্লাদারি জধা আ তিবুরার চাঙমা জধাগুনোর মুকপাঙিগুনো সমারে চাঙমা লেঘা চালুর পইদ্যেনে একান তেমাঙ দাক্কো। জানি পারা জেয়ে, সে তেমাঙত শল্লাদারি জধার বেচভাক মানবলা চাবাঙি বুঝোসান এলাক আ চাঙমা লেঘার পইদ্যেনে জেক্কে মন্ত্রীনানু তারারে পুঝোর গোছে, তারা ভেক্কে বুক ফুলেই জানেয়োন, তারা হন’ জন চাঙমা লেঘা ন জানন। মন্ত্রীবো জেক্কে এক তরফা সিদ্ধান্ত গরিলো, চাঙমা লেঘা চালু গরানা ইক্কনু আগলে মাস্টরনোই গরি পারা ন জেব’, নুও মাস্টর লাগিবেক আ সে প্রস্তাপ্তান কেনিনেটত পাখানি অহব (আবলে কেবিনেটর ভুঙলি দিনেই দেরি গরিবেত্তেই) সেক্কেয়ো তারা হন’ জন দরমরগরি আগলে মাস্টরনোই বাদি-মাদি চাঙমা লেঘা চালু গরিভের হধা তুলি ন পারন। ইক্কনু, ভগবানে জানে কেবিনেটত সিদ্ধান্ত লধে আর’ হয় ববর লাগিবো।

মুজুঙোর পত

২৯ আগস্টর তেমাঙানত আমার মন ভাঙি ফেলেলে অহ’ নয়। চাঙমাগুনোর নিজোর অহরকুনোরে বাজেই রাঘেবার তুবোল চালু রাঘা পরিবো। আমার আগরতলা লগে দিল্লী সিধুয়ো দাবীঘান তুলি ধরা পরিবো। দাবীঘান মানবলা ভারদর রাষ্ট্রপতি আ National Commissioner for Linguistic Minorities (NCLM)-র সিধুয়ো তুলি ধরা পরিবোগোই। NCLM সঙবিধেণর ৩৪৭ ধারা মজিম রাষ্ট্রপতিরে তার রিপোর্ট গবায়। “On a demand being made in that behalf the President may, if he is satisfied that a substantial proportion of the population of a State desire the use of any language spoken by them to be recognised by that State, direct that such language shall also be officially recognised throughout that State or any part thereof for such purpose as he may specify.” (দাবী গরিলে, রাষ্ট্রপতি যদি মনে গরে হন’ রেজ্যর ইক্কো চোঘোত পরে পারা ভাগে তারার হধাগানি সরকারী স্বীকৃতি পেভার ধারাচ গভন, সালে তে রেজ্যর বা রেজ্যর হন’ বামত, রেজ্য ভাচ ইজেবে স্বীকৃতি দিবেত্তেই ওহ্জেই পারে।) তিবুরার হন’ হন’ বামত চাঙমাগুনোরে ‘চোঘোত পরে পারা’ (substantial) ধরা জায়। আমার ইয়েনো পতপতে গরা পরিবো জে ভাচতুন লেঘারে হন’দিন ফারক গরি পারা ন জায়।

NCLM সঙবিধেণর 350B ধারা মজিম বানানি ওয়ে আ তার “investigate all matters relating to the safeguards provided for linguistic minorities under this Constitution and report to the President” (সংবিধেণত ভরেয়ে ভাচ-নাদাগুলেকনোর বে’ক পইদ্যেনে উদো লোভার আ রাষ্ট্রপতিরে রিপোর্ট দিবের) এক্জিয়ার আঘে। চাঙমাগুনো সংবিধেণর বে’ক ধুরন আঙলেই পেভঙ আ তুও থক ন পেলে হধাগান কোর্টত নেজা জায় নেনা আইন কাবিলর শল্লা লোই পেভঙ।

আমার বুঝোনাত : আমা অহরক - আমার জনম অধিকার। সংবিধেণে হি হয় ?

(পরিতোষ চাঙমা মিজোরামর একজন ভোকভোক্যে দবর হাম গরিয়ে। তে The Chakma Voice আ Sojaak-র কাবিদ্যেঙ। pchakma@gmail.com-সাগিনত তা উদো পা’ জেব’।)

